

06/09/2001

BN terbukti laksana tanggungjawab bawa pembangunan

KUCHING, Rabu - Kerajaan Barisan Nasional (BN) yang menjadi peneraju kepemimpinan negara selama ini terbukti berjaya melaksanakan tanggungjawab dalam membawa kemajuan dan pembangunan pesat kepada rakyat di negara ini, khususnya di Sarawak.

Kejayaan kerajaan dapat diukur melalui kestabilan politik, ekonomi dan juga pembangunan pesat yang dinikmati semua kaum di negeri ini.

Ahli Parlimen Santubong, Rohani Abdul Karim berkata, kerajaan sememangnya sentiasa melakukan usaha berterusan dalam memastikan rakyat tanpa mengira kaum dan keturunan, dapat menikmati pembangunan sama rata.

Beliau yang juga Setiausaha Parlimen Kementerian Luar Bandar berkata, segala kemajuan yang dinikmati rakyat di negeri ini adalah atas usaha dan kerja keras kerajaan BN.

"Hanya kerajaan yang diterajui BN saja yang mampu membawa kemajuan sebagaimana yang kita kecapai pada hari ini.

"Kemajuan dan kesenangan rakyat di negeri ini bukannya datang begitu saja serta bukannya atas daya usaha pihak pembangkang, tetapi oleh BN.

"Pembangkang hanya pandai menghasut rakyat untuk membenci kerajaan saja dan bukannya bertanggungjawab ke atas rakyat," katanya pada majlis penutupan program Jabatan Pengangkutan Jalan (JPJ) bersama rakyat di Dewan Serbaguna Kampung Telaga Air, di sini, hari ini.

Justeru, Rohani mengingatkan rakyat agar jangan mudah terpengaruh dengan isu dan agenda yang cuba dimainkan pembangkang bagi meraih undi dalam pilihan raya yang akan diadakan pada 27 September ini.

"Memang tidak dapat kita nafikan, setiap kali menjelang pilihan raya, pihak pembangkang akan mengatur strategi termasuk menggunakan isu dan agenda yang tidak betul, semata-mata bagi mendapatkan sokongan daripada rakyat.

"Antara isu hangat yang diketengahkan pada pilihan raya kali ini ialah isu adanya calon yang kononnya ditaja oleh Umno yang akan bertanding di Sarawak.

"Di sini, suka saya mengingatkan sekali lagi, seperti yang dinyatakan oleh Perdana Menteri, Datuk Seri Dr Mahathir Mohamad, Umno tidak bekerjasama dengan mana-mana calon daripada parti pembangkang termasuk calon bebas," katanya.

Justeru, Rohani berkata, orang ramai di Sarawak tidak seharusnya percaya dengan dakwaan pihak terbabit.

Umno, katanya, tidak bekerjasama dengan mana-mana pihak pembangkang di negeri ini, sebaliknya memberikan sokongan padu kepada calon BN.

Beliau turut mengingatkan pengundi di negeri ini agar turun mengundi beramai-ramai pada tarikh pengundian yang ditetapkan.

(END)